

3 JON

¹E Kristen nanjo gate. O ijo was bole Gaius, e na anjam endi nengrenyosim ni qa qarinyonum. E ni bole mermqai. E ni tulan qalaqalaimeqnum.

²O ijo was bole, e ni qa Qotei pailyeqnum. Yim a na ni aqaryaimimqa ino wau kalil geregere brantqas. Osim ni segi dego bole sqam. E qalieonum, ino qunun bole unu. ³Nami Kristen was qudei nangi e nubqa bosib endegsib merbeb, “Gaius a anjam bole dauryeqnu.” Degsib merbonab e qusim tulan areboleboleibej. Od, e qalieonum, ni anjam bole dauryeqnum. ⁴Ijo angro nangi anjam bole dauryeqnub e di quoqnsim deqa e tulan areboleboleibeqnu. Ijo arebolebole dena arebolebole kalil tulan bunyejunu.

Gaius a na aqa Kristen was nanji geregereinjreqnu

⁵O ijo was bole, ni anjam bole dauryoqnsim Kristen was nanji geregereinjreqnum. Osim tamo qudei nango ulatamu ni qaliesai qaji nanji dego ni na geregereinjreqnum. Di ni kere yeqnum. ⁶Kristen was qudei nangi ino qalaqalaiyo kumbra deqa saeqnab Kristen tamo ungasari endia unub qaji nanji queqnub. Ariya Kristen was nanji di olo tigelosib walwelqa laqnibqa ni na ingi ingi qa nanji aqaryainjre. Ni degyqam di kumbra bolequja. Ni Qotei aqa areqalo dauryosim nanji aqaryainjrim nanji gilqab. ⁷Tamo nanji di Yesus aqa wau ojqaqqa maroqnsib deqa nanji aqa anjam osi walweleqnub. Ariya nanji walweloqnsib nanji sawa bei bei qaji tamo nanjoq dena ingi ingi osaieqnub. ⁸Deqa iga na tamo deqaji nanji aqaryainjroqnqom. Iga degyqom di iga nanji koba na wau qujai sosim Qotei aqa anjam bole singilatoqnqom.

Diotrefes a kumbra uge yeqnu

⁹Nami e anjam qudei nengrenyosim Kristen tamo ungasari nunjo qureq di unub qaji nanji qa qarinyem. Ariya Diotrefes a tulan diqoqnsiqa a na tamo kalil nanji bunjrsim aqa segi ñam soqtqajqa singilaeqnu. Deqa a gago anjam di quetgosaieqnu. ¹⁰Deqa e ningi qa bosiy aqa kumbra deqa ningi olo saingwai. A iga qa anjam uge uge mareleneqnu. Di segi

sai. A na Kristen was nan̄gi aqa talq joqsi gilqa urateqnu. Yeqnaqa tamo qudei nan̄gi na Kristen was qudei nan̄gi nan̄go talq joqsi gilqa laq nab a na nan̄gi olo getentnjreqnu. Osiqa nan̄gi Qotei tal miligiq gilqa dego saidnjreqnu.

Demitrius a kumbra bole yeqnu

¹¹O ijo was bole Gaius, ni kumbra uge dauryaim. Ni kumbra bole segi daurye. Tamo a kumbra bole yqas di a Qotei aqa tamo sqas. Ariya tamo nan̄gi kumbra uge uge yeqnub qaji nan̄gi Qotei unqa keresai.

¹²Tamo kalil nan̄gi Demitrius a qa mareqnub, aqa kumbra bole. Qotei aqa anjam bole a dego tamo bulosiqa Demitrius aqa kumbra bole qa mareqnu. E dego a qa mareqnum, aqa kumbra bole. Ni qalie, ijo anjam di bole.

Jon a Gaius unqajqa bosim a ombla anjam marqab

¹³E anjam gargekoba nen̄gren̄yosiy ni qa qarinyqa kere. Ariya e nen̄gren̄yqasai. ¹⁴Sokiñala e ni qa bosiy ni numsiy aqo aiyel ombla anjam marqom.

¹⁵Ni are lawo na soqnime. Kristen was endia unub qaji nan̄gi ni qa kaiye anjam qarinyonub. E kamba dego Kristen was kalil ni koba na unub qaji nan̄gi qa kaiye anjam qarinyonum. Ijo kaiye anjam di ni na nan̄gi min̄jime.